

國朝畿輔詩傳

國朝畿輔詩傳卷五十

長洲陶

樑覺薊輯

天津梅成棟樹君校

翁樹培

樹培字宜泉大興人方綱子乾隆五十二年進

士歷官刑部貴州司郎中有翁比部遺詩一卷

翁方綱傳兒生于乾隆甲申余方渡海試瓊州  
占者曰此兒壽命不長宜出繼異姓為子或可  
免及北歸以語同年錢蕻石蕻石曰是宜為吾  
子遂攜至錢家蕻石名之曰申錫字曰申之是  
時余以再入翰林領修四庫書日事校讐不暇  
為舉業課計兒獨窺所校說文嗜之雖案有他  
家墨帖皆所不願學惟篤好摹寫篆隸其後習  
舉業而不嫻詞藻專力校勘於史家年月歷朝  
年號後先同異如鍾廣漢建元考萬石坡紀元  
韻敘諸編尤所詳核于洪顧諸家泉志更為該

悉予亦望其將來從此博涉攷訂之學庶幾有成而孰意竟止于此乾隆丙午舉順天鄉試丁未成進士改庶吉士己酉授檢討嘉慶丁巳

御試三等補刑部主事辛酉壬戌會試充

同考官己巳升貴州司郎中俸滿引見

蒙恩遇日夜思所以展力圖報稱職者實則無他

長才惟有能細心校勘訛字自本章文移及司

藥案冊繼以夜歸籌燈詳看夜入值宿或備奏

西苑皆伴系手抱每五鼓趨入則夜半即起

以此為常其後乃習飲酒積毒始發于目漸不

能治官書遂至不救著有錢錄若干卷於分隸

最所究心去年秦敦夫於揚州鶴亭熙隸韻兒

欣然有志校讐昨敦夫以拙著隸韻考正三卷

續刻於揚亦寄一本於兒

俾附名其後而已無及矣

紅豆樹館詩話自來泉譜如唐封演以下諸家

多不傳傳者以宋洪遵泉志為最古第其書雖

曰賅博不無附會宜泉前輩搜博采垂十餘

年綜括成編亦可稱專門之學矣詩無刊本此

卷得於葉比部志詵排冢妥帖  
比之蘇氏斜川不失長公家範

題錢舜舉張麗華侍女汲井圖擬作

望仙樓閣珠簾卷深院春寒轆轤轉內家宮樣淡妝成  
曾侍翠華隨鳳輦小來從幸臨春宮瓊花璧月君王同  
金盤進酒玉階冷銀牀露重雕闌空新聲狎客清歌罷  
秋風團扇昭陽夜承香一曲後庭花樓船十萬臺城下  
當年侍女汲寒漿後日隋師入景陽君不見金陵宮裏  
燕脂井化作燕脂淚幾行

吳漁山山水卷

自題云康熙乙亥秋耕烟先生見  
訪屬寫

漁山石谷同學朋派共烟客廉州承後來分途互標識

誰爲軒輊殊淄澠耕烟外史得名早泰常衣鉢留規繩  
亥秋幅紙來乞寫曰慙筆法輪精能畸人高致異流俗  
肯與時輩隨愛憎眼空骯髒絕磊塊一掃結習除畦塍  
軒軒逸氣照嶺嶠落落俊骨開峻嶒想經大洋海東注  
沐浴百寶雲霞蒸盪胸瑰奇盡收攝意象恍惚神驚騰  
歸來落墨恣渲染尺幅迅掃瀾自矜斧皴獨取大癡法  
瓣香特藝梅花僧自題清蒼出淡遠未甘嫵媚趨吳興  
雷門豈果擬布鼓葶村漫自評延陵麓臺之論信然否  
冰縑一月開千鏡

鄧蓀洲繪雙井圖

鄧生來往江湖間一官學博猶清閒  
宜州背爲分宜縣訪古遠溯宋以還  
涪翁舊宅在修水釣臺俯瞰明月灣  
秀江亭址亦湮廢崇宣題字埋榛菅  
春秋佳日兩度去墓門草已犁鋤刪  
焚香展拜讀碑刻低回躑躅摧心顏  
周垣古栢鬱蒼翠岡巒拱衛川回環  
長江如虹宛襟帶奔湍急溜流潺湲  
澄空一望浩無際層青四面排烟鬢  
傳聞雙井在江底佇視不見綠豈慳  
是日天高氣清曠波光日色浮朱殷  
長空無雲倒影碧晴霞彩射交爛爛  
恍如兩月現水面凹痕印徹雙觚圓  
旋渦盤轉互回折下有深綠層層彎  
須臾交流湧如沸注想不憚目力艱

歸來齋中臥三日繪圖作記心手爛我因滄桑感今昔  
七百載尙留人寰當年造茶此泉汲結亭築室遠市閭  
村居遷徙澮渠易龍泉鳳巘餘津關雪泥陳蹟偶寓耳  
公之逸氣垂河山鄧生學舍薦荀脯修綆探索嗟難攀  
願君掣水訪遺磬石闢苔款應班班

李西涯移竹詩卷沈石田畫

吾齋舊藏種竹卷中有謝人乞竹詩行楷篆草諸體備  
攢上刻竹兼刻辭蘇米齋中繪公像倩友爲補圖西涯  
南軒開窗植新綠乞種買自城南移誰知宋子廿年後  
詩畫合卷來相貽此詩還與昔卷證首尾字句無差遺

啓端石田爲公畫與酣神到隨手爲蕭疎樹影蔭茅屋  
水邊略約圍村籬雙僮擔負致一束行來曲徑穿透迤  
想公小步獨凝立徘徊佇望撚吟髭石田韻同玉汝和  
成齋半舫揮淋漓從來移竹審時日神全竹醉竹不知  
匏翁一絕最風趣想見抱膝聯吟時羣公雅有此君癖  
乞栽分種弟與師不徒張甥解公意修篁徧植東西陂  
江南陸寬漫摹擬白石翁印新磨治慈恩寺旁寄憑眺  
修竹巷裏軒鬚眉公時詩名震天壤文章彪炳鳴長離  
響牖鐘樓渺烟月沿湖仿佛留遺基濃陰西郭隔城市  
玉堂退直仍委蛇歸然靈光感今昔又從善甫齋頭披

三百年來墨緣合信乎文字精英奇

題揭鉢圖

厲詩但衍寶積經前此作者推阮亭此卷無詩但存畫  
淡描水墨非丹青紛拏變幻鬪俶詭精怪出沒鞭雷霆  
騰馳電掣獸奔駛刀劍斷折紛雨零鉢底忽現小兒相  
手足卷曲如拘囹半空天樂下鸞馭慈光普照留雲耕  
我於此圖悟禪指畫師寓意加丁寔佛言貪嗔與癡愛  
根塵淨絕無哇町爾緣性嗜噉人子饕餮饕飮汗羶腥  
是日貪心殺機伏輪回轂轉不暫停爾緣幼子失所往  
七日徧索窮幽冥是日癡心墮惡趣如繭自縛迷難醒

爾作狡獪聚醜類舉旗揮刃鋸發刃是日嗔心卽苦海  
無明蔽熾通天庭爾因弱雛乞援救涕淚哀籲憐伶行  
是日愛心著魔障愛未能割况汝形四者轆轤互薰染  
流派那辨涓與涇遂興么麼齏蠕動蕃孳鼓教生螟蛉  
鉢耶非鉢乃佛力琉璃七寶圓光熒相與非相難執著  
鳩盤嫫母尹與邪神奸魑魅起妄念愛魔未許逃天刑  
慈悲智慧釋塵縛空空倒挈軍持瓶離奇恂怛震心魄  
花妖木客招羣靈人非人兮想非想青燐佛火輝流螢  
李森朱璧不可作誰與畫手存模型不徒羅家繪圖擬  
好續梵偈傳鐙銘

陳白陽古木寒鴉

兩崖老樹搖秋聲疎林撼撼飄紅英槎枒瘦削倍蕭瑟  
俄看數點寒鴉橫橫處排空復成陣欲落不落棲還驚  
性果求安便止宿心緣懷侶猶飛鳴商飈習習振林谷  
紛紛翔集仍回縈一枝豈不故巢戀歸羽未定煩經營  
烟雲半抹意恂悅樹杪遮斷紅霞明長空來往極寥廓  
徘徊悵望勞浮生合離下上得所適超忽遠近隨遐征  
樹惟見鴉不見葉夕陽疎影銜山疇山人靜者獨觀妙  
機心世慮兩不攖臨流拄杖意何屬坐視物化無枯榮  
寫生取神不求似氣味包蓄逾孤清微煇淡墨漸無蹟

門徑異否衡山評

吏部藤花廳圖

崦西首倡藤花篇恨未諸老聯吟箋綠陰盈庭花滿架  
回思手植三十年補圖又在十年後斯卷翻以斯圖傳  
有明中葉際全盛廟堂吁咈升羣賢銓衡職司慎簡任  
承明珥筆皆神仙畫省委蛇日無事鳴珂佩玉翔花甌  
右廂之外南窗前盤空天矯含風烟甘棠蔽芾得嘉蔭  
雙檜翼翼相鈎連庭空畫永吏人散枝垂蔓覆東西偏  
解衣盤礴日三匝濃陰半翳几案邊文定文恪踵相繼  
于茲講學排書筵後來文敏陟少宰誰知風景猶依然

與懷感舊仰前哲酬倡贈答情纏緜流傳佳話滿吳下  
包山粉木彌精研我因舊聞考朱氏古藤之記徵莆田  
莆田方輿邦有古藤記一代之文章備掌故百年元氣包山川  
三吳紀文獻流連光景誇清妍鳳池東南接咫尺定與  
柯亭劉井詩同編

南唐官硯歌 背鑄皇祐三年歐陽文忠記

百六十字輝星躡永叔所得原叔傳我從皇祐溯保大  
後先俯仰已百年宋興百年盛文治龍圖學士登集賢  
搜碑手題集古錄傳信新訂薛史編夷陵舟中伴行笈  
玉堂傑直供丹鉛回思初得二十載雙桂樓下屏風前

牡丹姚魏譜京洛鶴鶴眼暈摹方圓公時南京作留守

此硯先已來應天

王原叔  
應天人

沈湮棄置忽顯豁押尾小印

精雕鐫昇平回首憶疇昔江南野老詞淒然自言幼時

嘗及見金陵舊有負郭田先朝元宗重文史縹緗器具

皆精妍承明石渠富珍秘珽珪之墨澄心箋是時歙州

置硯務餼廩月給唐國錢龍尾山頭刷蒼骨羅紋坑底

淘清泉尙方歲取有程課箕裘世業彌精專溪流漸湮

山脉斷滄桑變後歲月遷摩挲此硯三歎息無端樞觸

增流連一代繁華說江左萬古靈秀鍾山川李少微名

漫題記謝景山瓦曾周旋

琅邪臺秦篆

史言秦碑六刻石碣石之刻古未聞繹山摹本出徐鄭  
岱頂方石經火焚或云之罘墮海嶠會稽篆亦非原文  
琅邪石闕二千載獵碣而後誰與羣秦皇爾日神仙慕  
海上曾經翠華駐磨厓作頌紀成功飭俗安民平法度  
從臣橐筆勒貞珉耨尾頭銜姓名具遂窮渤澥望神山  
遠移黔首編屯戍層巖屹立高崔嵬藤蘿蔓結封塵埃  
天風蕭蕭海潮汨神物呵護留山隈石紋迸裂變青黝  
半面泐斷聞奔雷十行謹存二世詔夜半灼灼星芒開  
遙想熙寧密州守鉤摹嵌置超然臺文助刻本今轉佚

莫以此石輕疑猜五大夫字竟完好仿佛篆譜留烟煤  
宋劉跋秦篆譜序云余家所藏項那殘字有五大夫字 巋然靈光峙東海樽桑輝  
映瞻蓬萊

林外得碑圖爲何夢華題

殘碑歲久埋榛蕪至聖林外之一隅牆隅隙地極空曠  
每禁收采巖樵蘇茫茫平壤鬱元氣盎盎厚脉蟠神區  
異哉光芒露石角絲竹夜半聞笙竽流螢飛光照苔綠  
風雨蘇蝕穿與跌何郎循牆步偃僂捩衣注視神踟躕  
鳩工揮鋤具畚鍤短褐三尺升須臾摩挲洗剔質蒼翠  
偏傍尋繹文模糊元年青龍在乙未稽諸永壽千支符

五車言作 卷三十一  
據守長史兼相事德施州里恩交孚緬惟闕里溯譜系  
十七世恰當東都聖裔名賢每輩出履方約變洵通儒  
何郎嗜古獲奇造滌碑手訂前人誣寶氣熊熊剖隋璞  
眼光炯炯探驪珠重來曲阜扶幽秘更補志乘蒐輿圖  
同文門邊式景仰想像禮器陳遵觚

宋商邱藏漢西嶽華山廟碑

四明本與華陰本未得借對同摹臨西陂墨寶今始出  
延平劍合鉛霜鐔裝池尙仍王氏舊護持幸未生良蟬  
流傳河北到吳下中丞什襲珍珠琳南原何年撫隸字  
援引碑記徵亭林蘆墟百木率違臆沿誤宜止金冬心

晴窗響搦悟筆妙波磔起伏皆可尋肥瘦勻圓露風韻  
廓填細綫抽芒針古光油然盎楮墨精采煥發彌深沈  
中郎書格此圭臬欲以蠡測知蹄涔翳昔西京郵隆日  
歲時秩望神居歆峇巖太華峙雄鎮峻倚碧落凌崎崟  
有司立祠肅將事精湮胎嚮通微忱感孚山澤氣訢合  
典雲觸石爲甘霖立石紀事示來許靈宮曩屬長森森  
百有餘年莫存識延熹歲月猶未深爾時文字已磨滅  
何况此石傳至今孟津評書擬莊列意在絃外求遺音  
文字精靈信非偶後先諸老聯賡吟他年倘踐刊石諾  
題名竊附碑之陰

題羅雨峯登岱圖

巖巖作鎮坤維東靈區福地開琳宮羣峯拱衛環龍嵒  
懸崖陡絕深徑嚙金庭玉戶非人工雕甍刻柱皆磨銅  
資生化育惟神功垓垓覆載胥嶢嶢累朝祀典明禋隆  
豐碑矗矗高穹窿對松山樹交青葱大龍峪水流沖澗  
紆迴盤登天梯通天門跌蕩摩蒼穹飛龍翔鳳躋當中  
石閣仙洞疑崆峒只觀峯齋凌層空玉皇頂上光熊熊  
三更日出吞鴻濛溥桑照徹紅雲紅鋪金耀紫晴霞烘  
卷騰掣電流長虹殷雷激射聲齶齶手滌參井乘罡風  
斗杓旋斡神霄崇盥胸決背飛雙瞳披圖盡攬方輿雄

下瞰培塿皆兒童兩峯好奇興不窮  
筇屨隨奚獍歸來官舍方恩恩  
腕底浩氣猶蓬蓬尺幅千里全包籠  
巾箱縮本眞形同他年更登太華衡  
恒嵩題名大字親磨礱

五代閩城甄歌

金輪王子人間生判劍躍者王詳卿  
三郎軍中羶紫氣全開割據都榕城  
福州羅城最先築天祐以後增恢宏  
巖巖雉堞廿六里敵樓睥睨相回縈  
東界長川盤別浦鉤連欄楯飛丹甍  
瓚甄一千五百萬一一印出錢文明  
黃子家居近城趾後園隙地坡坨平  
偶因掘土見甌甓

稜角淺露埋縱橫苔痕抉剔辨款識圓花方絡文戾戾  
大錢四出徑逾寸肉好備具型模精我因泉志證闕史  
永隆天德多紛更鐵錢銚効質龐重開元字尚沿其名  
異哉當時創此式隱以陶旅規權衡居然王字並錢列  
側有王字地歸吳越幾先萌黃子不忘踐宿諾一枚千里來  
帝京威武軍字幸未泐魏寶有威武軍三字瓶寄我拓本裝池并  
我家閩中溯先世訪古何帝苔岑盟閩錢夢想不可得  
愧我譜錄何年成

五銖泉文甄

我齋日日摹泉文詳求肉好寸與分龍泓之譜建武範

手拓未得借何君每按漢泉例漢瓦西京字體殊權斤  
漢甄已有列錢制金缸壁帶徵前聞誰知一片落懷袖  
摩挲玩賞遇所欣晴窗借拓搗蘭麝香篆鬱律蟠氤氳  
厚準漢尺寸有半繩痕絡界交回紋中央一泉具輪廓  
土花黯黹餘清芬我考五銖据班史鑄自元狩五年始  
後來沿革歷六朝傳形公式文相似精鏐和織迄開皇  
懋遷通變傳張軌童謠讖兆應黃牛不比南陽占白水  
此甄疑自長安來想像苔斑漢宮址赤仄誰翻椒壁泥  
紫紺印出簾紋紙樣窳四出擬咸和晉咸和甄有製豈  
閩城仿王氏王審知城甄作錢篋中款識歷元康唐藏  
文淵寶以一見贈

康他日馳緘報黃子

爲孫淵如題羅雨峯所作倉史造字圖

史皇手泄造化奇貫徹天咫窮坤維靈光四日照上下  
心周四象摹兩儀仰觀星躔耀奎宿俯察鱗介蟠躩跼  
金函玉笈抉瓊奧青文丹甲徵神龜陽虛山高攬形勢  
元扈水汭支分歧流行天壤燦名象崇卑效法皆師資  
遂肇形聲判體勢如指聚米沙畫錐物初無象漸啟敷  
孳生乳孕因蕃滋龍顏侈哆想穆穆禪通草昧淳以熙  
大文炳煥燭宇宙青雲糾縵補桑枝軒轅之世造書契  
始作八卦迺庖犧增華踵事籀隸楷几將爰歷沿冰斯

神明通變亘悠久實惟作述兼君師方今

聖人

重文教六經日月中天垂考文稽古訂源委靈威宛委  
搜無遺史官村中訪漢刻片紙搨得延熹碑豈徒衙縣  
證衙字利陽遺刻留崇祠紫雲山刻訪畫像衣冠古樸  
旁題辭首曰倉精造王業手持句股矩半規我疑此義  
系倉史欲倩好手重摹追請拈古幣考路史該括奇字  
銘鼎彝

芝山自洛陽寄南宋錢十五枚賦謝

客冬送君話南浦欲借新知餽囊篋仲春月半寄書來  
燈下閒緘色飛舞書言偶過洛陽城轆轤車塵少地主

南宋遺錢世罕傳傾囊購自坊間買宋家富盛想東京

定鼎開基拓疆宇緡錢歲鑄累百萬權貨通商徧歷戶

昇平文物極熙豐夢溪筆談熙寧六年以後歲鑄銅鐵錢六百餘萬貫開寶型模

垂藝祖至今圖法廣流傳北宋紀元十居五自從南渡

駐餘杭盡斷河山留半堵犒師輸幣數頻仍郊壇歲賜

糜官簿軍儲稅課日不支內帑封樁耗難補遂行交子

會子法比較錙銖同市估銅坑鐵冶出不敷古器銷鎔

任摩取宋史慶元三年以所括銅器鑄當三大錢當時歲額已寥寥今日吉

光真片羽淳熙以後迄咸淳背有紀年瞭可數每思綴

集彙其全撫拾畸零心獨苦糾謬誰知董適名編年竊

續洪遵譜方疑北地不多覲倘到吳中或能覲何期郵  
致十五枚綠蝕苔花繡文古風塵初解鹽池裝輪廓猶  
霑洛陽土銷金鍋裏水衡錢鑄牌尙缺臨安府

五銖錢范歌

底有日利二字篆書

五銖流行漢迄隋中間沿革多改移最初元狩及元鼎  
百年俟過哀平時黃牛白腹識先兆紫紺赤仄仍前規  
中平西出命名異初平更以銅人爲傳形直百昉巴蜀  
西涼徼外通龜茲梁初公式變么稚對文四柱紛參差  
五朱五金互从省大通大富皆殊辭何如此范列錢六  
形模尙是西京遺曩時篋谷篋珍弄繪圖作紀緘函馳

芭堂摹本宋子拓盛澤王與錢塘施

金石契載五銖范藏盛澤王勺山家

宋芝山以五銖范拓本見贈爲施耦堂所藏

山陰童氏范十六恨未彙帙同

裝池龍泓所藏紀建武隸書頗肖中郎碑今見此范日

利字篆文陽識尤瓌奇我思造器有深意竹垞跋語未

盡之煎銅撥蠟迭爲用范金合土原相資中爲圓星若

樞紐外乃交午分旁支一支一出綴錢一面背輪廓方

圍隨左右凸凹各相配分行就列排四維四邊之高與

中等周圍如鏡如槃區復設一范制同此廣博徑度無

纖歧乃搗細沙劑和蠟填平搗實防斜敲旋以波范合

其上膠固罅隙纒毫絲須臾去范出挺埴兩面印出儼

畫雖中央之星轉空透淺深所受全無虧錢文正書變  
反寫牝者成牡高者卑范之陽款作陰畫庚庚文理森  
列眉更教依此作此式數盈什伯成纍纍層層巽積錯  
綜貫堆璨未許柱與檣旁有繩紋束以絡重規疊矩痕  
交縻俯仰相承鬪筍距鑿柄合并交坎離中央洞穿眈  
一綫經緯四達花銜枝兩邊復有距相受樞筦密對周  
難窺淇鑪鑪鼓煉汞液橐籥運動精華滋乃從中央達  
孔竅如瓶瀉水膠注卮泉文面面肉好具幹質一一附  
萼垂新銅發型出模後翦輪錫鉛加磨治始知鑄范寓  
精義考工遺法猶堪追更摹小印鈴古語

漢印文  
日日利還憑

律尺量慮虜

音慮夷

顏齋漫取范鑑范款文竊識宜泉宜

潘毅堂藏大泉五十錢  
范底有文曰宜泉吉利

王石谷松峯積雪圖

長空萬里鋪溶溶  
縣亘迢遞排羣峯  
凝陰積沍凍不化  
白描幻出千芙蓉  
岡巒迴複蘊深厚  
谷口盎盎寒雲封  
彌漫浩淼但一氣  
高下環繞皆長松  
橫枝老幹轉青翠  
扶疎夭矯蟠虬龍  
駢柯偃蓋互垂蔭  
森森勁節凌嚴冬  
巉巖刻露削冰玉  
懸崖疊嶂交葱蘢  
晶瑩恂悅眩白晝  
嵌空凹凸迷山容  
淩兢峭厲裂石骨  
霏微黓霽層霄濛  
坡陀蜿蜒失鳥道  
縈紆仄徑無人蹤  
江干遙望杳無蹟

浮圖隱隱如聞鐘此時大地潑水墨四圍淡沱雲重重  
光搖銀海映懸圃玻瓈晃漾冰壺鎔渾茫沕穆攝元氣  
涉趣循境嗟何從三王齊名噪江左婁車派早傳吳儂  
耕烟同時獨超絕畫法直合南北宗續鐙庵後又三載  
櫟園錄憶金陵逢寒飈展卷接几席仿佛雲海來盪胸  
和瞿鏡濤五銖泉硯山歌韻

久疎夙諾今猶昔楮素依稀土花碧莫由覲面憑尺書  
千里盟言抵金石墨痕拓比蟬翼輕斑剝窺來鵝眼隻  
奧壤初傳紫紉模異文乍啟青溪宅天生古物各有緣  
購以緡錢會逢適宦同山下說安中傍好分明無直畫

銘徵史鳳監掾蒼年溯黃牛腹占白公式傳形製遞殊  
翦谿消磨泯無蹟硯山功譬起鑄銖拳石之多累千百  
隱然輪廓具坡陀薜蝕苔勻剔猶昔綺交藻合篆雲連  
血暈砂凝綠文赤面幕環周潤澤含膚寸氤氳縈咫尺  
範圍四出自巉巖圓黛層層攢繡陌源流豈果蜀山遺  
品類無須洪氏核寶山縣裏夏家橋陳姓農田墾荒僻  
七巨缸中貯幾多竊恨斯時罕斯癖回首壬寅已廿年  
過眼雲烟宛虛擲甕亭舊址憶方山石函斷碣吟詞客  
一簣初基閱世多兩地相思與年積那爾肅侯謝殷勤  
唱和訪嫌語多嘖

四月十九日重登小黑山上帝廟

遠山如帶拱神州兩月重來話昨游人在上方臨下界  
時當初夏似深秋葱蘢樹色千尋合捲靄嵐光四面浮  
山圃桃花開正好可容借榻暫淹留

盡收形勝據層岡灌木陰陰四月涼拾級階如盤鳥道

環流水已接羊腸

西有羊腸河

百年棟宇碑猶在千里關河

路正長若向斜曛閒佇立夕陽西望更蒼茫

送倪迂存歸望江

譜錄同心得幾人等閒握手又三春迂如元鎮原非嬾  
癖比蕭愚未是貧敢擬著書追顧協便應繡像拜洪遵

佩裝回首天南北珍重臨歧話別辰

萬峯環抱大雷池坐擁書城嘯咏時小茗山旁花作幕

白華軒畔柳如絲六朝人物留崖薜三孝祠堂隔水湄

尙有荒臺生筍籜滿湖烟月總相思

予所收元銅權九明銅權四鐵權二彙裝于冊題

後

每愛金文刻搜羅到古權簡明詳紀地排次儼編年玉

府和鈎重官司法令懸押同鈐尾署匠並姓名鐫世祖

規初定元貞式遞沿盜都鑑冶擅

元史益都產銅

總管課程專

秤或殊輕重鍾還辨橢圓劑量工有準較勘度無偏權

稅來齊魯輸鍛首朔燕款存大都路蹟補舊聞編廣表

通畿甸流行閱市塵國書音可譯梵篆體難詮至治權文云二

十五斤秤又蒙古字三以蒙古字韻攷之是一斤錘三字又有梵文四行不可識貨漫誇杭郡

文猶認應天革除遺號贖忠定誓心堅永樂元年鐵權文曰濟南府因

及鎮忠定公事宣德銅九勝南京製並傳二三朋惠贈五百載

推遷至元二十九年至乾隆六十年凡五百四年當日陳街肆今辰粲几筵

兩朝型具在一代制釐然嘉量銘詞核秦斤訓詁研追

思宣課字手搨等雲烟

黃耦寶以南宋錢十三枚見贈賦謝

橐裝千里贈鄭重故人情游蹟三吳歷珍儲萬選精同

心憐嗜癖一笑爲開籬閨擬桐枝茁排看雁柱橫綠斑  
銅質潤鏽蝕土花瑩憶昨丹鉛訪嘗經市肆行偶覘輪  
廓異不啻百千盈淆雜無倫次錯銖白品評搜奇心獨  
苦拔萃眼偏明樣以希傳貴文因罕見驚畸零矜創獲  
掇拾發光晶南渡都初定臨安業再營用財糜帑藏權  
貨絀權衡貢賦頻輸餽邊疆屢用兵鍾官皆減額會子  
但空名取給疲坑冶封椿改課程當三銅並鐵折十重  
權輕卽利鑪添置漸春制遞更度支猶不足鼓鑄已無  
羸誰起編年例全教幕字呈淳熙迄咸淳錢背各紀年數元爲王者  
首十乃數之成嘉泰錢元字淳祐錢十字譬以千支紀還如甲乙并

重文徽寶祐寶祐錢文以皇宋元寶代之以寶字不可重出也小品詫端平聖

宋追皇宋謂仁宗皇宋通寶杭京想汴京低回夢華錄憑弔武

林城倘其冬青瘞何時野老耕系年廬井井募款認庚

庚什襲慳囊富回環妙緒縈私衷銘厚誼玩物戒虛聲

昔荷閩甄餉今叨古爵擊分光承口口并以古爵古鏡見贈報德

愧瑤瓊結我金蘭譜堅君石友盟以下原缺

陸秀石以貨泉常平五銖二枚見贈賦謝

西京園法沿新莽高氏遺文撫北齊食貨倉儲同取義

識成白水豈無稽

試從天保追天鳳五百年中制幾更今日摩挲倍矜貴

篆文精湛認常平

題法時帆詩龕嚮往圖

異代詩人萃一堂風流千載說柴桑打鐘掃地三生夢  
可少同龕蕤瓣香

三昧何能掩韋柳五言選卻右丞刪欲將畫裏徘徊意  
叩取漁洋甲乙間

劉廣恕

廣恕字可亭號耐泉慶雲人乾隆五十二年進  
士官工部都水司員外有如心堂吟草

津門詩鈔可亭先生居官清  
正居家孝友足以表率士林

贈別石東菴

芳草天涯慰旅愁如何南浦有歸舟君悲十載歌長缺  
我愧三冬擁敝裘縱飲誰憐步兵酒多情獨上仲宣樓  
欲知別後相思恨千里滔滔濟水流

劉廷楠

廷楠字讓不號雲岡獻縣人乾隆五十二年進  
士官廣東廉州府知府有偶一草

李東田明經用東坡石鼓韻留別奉和

我生之時在己丑彈指流光童變叟廿年嶺海蟻磨旋  
又到梅州牛馬走舊業全拋嗤負腹新政試行慎防口

此邦文物盛淵源多士雲龍爭先後伊昔締交識一二  
於今望氣得八九驅車不須避陽鱈閉門無從見泄柳  
比年校士屬有司子細量才數升斗鮮新差擬管吐花  
詰屈或若柏生肘模糊老眼溷場師得無蘭艾埋蒿莠  
五羊名士今謫仙三載盟心吾畏友別裁僞體黜軋苗  
譎字方言辨乳穀譬彼象罔索元珠瞭如伏生識蝌蚪  
青雲意氣愛少年白髮心情憐宿荀我昔懷鉛佐玉尺  
候蟲時鳥紛唧嗾漫屈埽人伸僬僥敢重商彝輕漢卣  
所懼相皮反遺骨五色全迷目同叟二十八宿動星文  
指點翼岫與離嶼陋儒一得竊自喜與君論文覺顏厚

清言名理瓶瀉水宗派支流析某某多錢不敢傲貧兒  
良賈深藏如烏有卻慚俗吏走風塵委置詩書習鞭杻  
餉我新詩抵百朋應付琅嬛鎖雙狗惜哉梳妝不久時  
待字頻年猶未偶翻許劉安有仙骨解得徐鉉爲龍首  
瑰然大璞不雕琢留待良匠施攻培斲輪老手自有真  
雕蟲小技曷足取傳觀見說愈頭風長吟頓使滌心垢  
雲路從此看騰達風檐莫更歎株守縱然良馬感孫陽  
不遇先覩或同朽一編願付青梅巢梨棗長媿喬松壽

將赴廣州途中卽事口占

顛倒作奇想殘冬忽遠征河山三面繞行李一肩輕古

戍軍容肅巖疆戰壘橫海防關 廟算設險在承平

壯游天下半茲土最崎嶇裘葛崇朝易舟車百里殊漏  
天愁雨雪瀕海戒萑苻官轍前因在無勞說畏途

軍中卽事

羽書飛不到江潯雲壓孤城白日陰困獸祇今無鬪志  
王師自古尙攻心籌邊司馬星軺促擁節元戎玉帳深  
南裔從來開府地那堪車輔望氛祲

送廣州太守高青田歸里

同是天涯蟣蝨身雪泥鴻爪有前因七十里外論交少  
三十年中惜別頻白髮乞湖貧太守青山思頽老詩人

懸知不作妻孥計應爲蒼生一愴神

無題

盈盈十五鬪天斜雲懶烟慵初破瓜錦水有魚多比目  
雕闌無樹不雙花虛傳越客千絲網漫御金夫七寶車  
贏得青衫老司馬尊前重與說琵琶

綠楊影裏板橋邊翠袖銀箏晚放船杜牧三生猶入夢  
秋娘半老竟長眠風風雨雨華嚴劫色色空空切利天  
見說簪花圖尙在還愁執手歛如烟

豈是千花藏裏身維摩榻畔證前因迷雲夢雨愁飄汝  
見影聞聲總可人漫擬城南逢好好只從壁上喚真真

青天碧海無多日已閱紅塵廿八春

到老春蠶未斷絲博山沈水意迷離盪舟何處迎桃葉  
走馬無心折柳枝豈有黃金買歌舞偏勞紅豆種相思  
青山欲表真娘墓安得婁淞畫裏詩

馬思聖

思聖字子由寶坻人乾隆五十二年進士官廣

東平野縣知縣

諸葛嶺述所見

策馬上高嶺廣谷何崎嶇樵夫四山下聳肩挑青雲歸  
來日卓午曉出清霜侵攀條復掃葉那惜雙手皸負之

入城市得錢不足緡豪家方晏坐廣案羅八珍容知鼎  
下物束束皆苦辛

杜南棠

南棠字召亭號荔村贊皇人乾隆五十二年進  
士歷官春坊中允有荔村詩稿

秋日同友人登蒼巖若諸峯

危峯盪天去天尺上有烟雲接蒼碧不知雲外更何人  
但見飛花落巖石

國朝畿輔詩傳卷五十一終

國朝畿輔詩傳卷五十一

長洲陶 櫟 梟 薊 輯 甘泉汪喜孫孟慈校

舒位

位字立人號鐵雲大興人乾隆五十三年舉人

有瓶水齋詩集十七卷別集二卷

陳文述傳君十歲下筆成章十四隨父官粵之  
永福讀書署後鐵雲山因以自號安南入貢隨  
父廷使者賦銅柱詩相贈答弱冠登賢書從王  
朝梧觀察之黔值南籠狃苗不靖咸勤候勒保  
統兵征之觀察身行問君為治文書勒侯見  
而器之恒與計軍事狃苗平勒侯移督四川與  
君約從遊君以母老道遠謝歸貧無以養恒負  
米湖湘間歲一歸省母既又客秣陵會稽雲間  
九上春官皆下第遂絕意進取乙亥十月在真  
州聞母喪戴星而奔不納勺飲者彌月以哀毀

卒君性情篤摯好學不倦於經史古文無不讀  
尤喜觀仙佛怪誕九流稗官之書一發之於詩  
國子祭酒法式善以君與嘉興王曇常熟孫原  
湘爲三君作三君詠善書各體皆工能吹笛鼓  
琴度曲不失分寸所作樂府院本脫稿老伶皆  
可按節而歌不煩點竄爲詩專主才力每作必  
出新意所著瓶水齋詩不沿襲古法而精力所  
到他人百思不及非其性情篤摯所見端歟  
趙翼序開徑如鑿山破下語如鐵鑄成無一意  
不奇無一句不妥無一字無來歷是真能於長  
吉玉窳入又之

外別成一家

法式善序諸體之中七古尤勝前無古人

後無來者非漫淫於三李二杜者不能

龍鐸序他人之詩有六義鐵雲之詩兼有三長

他人之詩有四聲鐵雲之詩兼有五音他人之

詩有唐宋元明鐵雲之

詩則兼有離騷八代也

紅豆梅館詩話鐵雲風神散朗如魏晉間人少

隨父翼官粵西父歿遂家吳中已而移居湖州

徧交當時知名士而士大夫開府東南者羔膺  
成羣競相羅致舉橋今兩集二卷吾鄉宋觀察  
思仁所刻瓶水齋集淮南巴副使光譜所刻也  
君常論人無根柢學問必不能爲詩無真性情  
卽能爲詩亦必不工所作合騷掠雅矜奇灑落  
雖極意馳騁而無聖駕之虞蓋君博涉羣籍性  
情根柢載之以出非揚腹從事拘牽格律者比  
也君卒於嘉慶乙亥年五十有一誕之夕母沈  
孺人夢一僧款桂花自峨眉來  
覺而生君故又小字犀禪云

### 遊七星山棲霞洞

四山轉如圍一洞鑿其空跳出山外山朶入洞中洞日  
月所不到操炬以動衆照見諸變相鬼神恣搏弄黑伏  
石萬尖青瀉天半縫蛇行曲竇細狐聽冷泉滄迤邐三  
里餘人語聚一甕徑絕通風雲出險如出夢但覺精魂

搖不惜腰腳痛身輕霞飽餐胸羅星可種來聞清猿嘯  
歸與寒鴉共老樹挂斜陽前谿一僧送

盧溝

卧聞車馬聲已知遠行客開門見西山一笑東方白言  
辭茆店燈詰朝理輕策睥睨列女牆參差度官驛長橋  
橫濁流秋氣上龍脊松顛何嶙峋闌干鬪文石可憐一  
水開我裘隨塵積天風忽以吹不辨去來蹟相顧長征  
人毋乃利名役流波發桑乾逝者誰能惜

夜抵瓜洲

月落瓜步烟兩岸潮初靜孤舫暗中來艣聲柔可聽始

隣露氣滋未訝風力橫  
流入唱水調輟棹動清興  
背船一鳥飛汀渚  
赴遙暝颯颯蘆荻間  
沙田凡幾稜誰報隔  
江鐘人語三山醒

雨中望惠山

泛宅還驚幾蒼烟  
市孤艇濛濛細雨來  
山外落帆影疎  
梵隔谿符歸漁亂  
答簪何須望夕陽  
卽此清涼境側聞  
第二泉高瀉雲峰頂  
安得趙州茶禪寮  
味石鼎

晴山迎我來  
兩山送我去  
白雲木無心  
來去上山路  
感此懷客懷  
行行望烟樹  
百年惜浮生  
一葦無長住  
不如留茆菴  
青山有佳處  
招隱久寂寥  
冷然遠風暮

暮抵商家林逆旅識余是去年客復來

馬首聽西風遠此絲絲道蒼然暮色來  
暝樹受歸鳥時將枚數闌一宿此間好  
逆旅具盤飧願言共客飽與客似相識  
客行想不少我聞心悠悠此語令人老  
試問故鄉人還家誰最早

南湖舟中夜雨讀宋助教詩因題其卷

水宿不知秋夢破三色雨青燈翳江湖何似窗西語况  
復古錦囊美人拾翠羽微吟流水中漁唱和容與舊雨  
籠碧紗今雨歌白紵舒雅酬西崑宋玉愁北渚歸舟記  
篋篋颯颯鷗鷺侶銀竹打烏篷臨流怨芳序

舟泊穿石

兩山拱而立一洞明且秀諒非鬼神鑿亦無仙佛守青  
割天體圓冷咽泉花溜我船泊洞左所見徹洞右隱隱  
遠人村褰裳莫能就虛室候雲歸深潭許月受晴暄一  
瀑飛空納萬風吼洞裏旣黃昏洞外仍白晝由基躡甲  
射七札皆穿透靈嫺開鑪煉五色難補湊作此大光明  
天地分一竇俗境陔桃源古蹤閱勾漏我思訪奇書夜  
夢靈威授三復琅嬛篇牙牙難句讀

自安順赴鎮寧黔路之平者止此六十里

歷阻得夷塗耳目曠無礙清沙翠竹中人馬各自在天

公久好奇至此意頗悔設險知昨非履坦當晚蓋驅除  
四面山山勢盡謙退野卉藉作茵芳草積如黛微風生  
其間色相空所對如久夢忽醒亦少見多怪回首睽層  
巒烟雲互向背絢爛歸平淡悟入文章界鴉飛聲啞啞  
暝色漸歸隊城角露紅鏗一州如斗大

寄別他山

千金買寶刀古色繡難認一朝雌雄合餘劍器皆擯白  
我得他山臭味欣相親戎幕接深談往往爛至盪駁靈  
發書倉闕靡誇筆陣如以刃解解如以泥印印憶昔春  
風場雜客賞曠愼矧在西南隅所見餉亦僅如何一杯

酒見晚別偏逃秋襖過春襖俛仰才一瞬墜歡不可拾  
離緒亂於鬢始知良會難良會天所吝昨聽杜鵑啼行  
李近霜信迢迢復迢迢此意無從託努力讀離騷西風  
吹雨鬢

五更渡章江至沙井

月落江水平月白沙與白有似琉璃屏柔艣一枝劃江  
痕隨艣枝一線隱龍脊又似水精簾中安玉界尺卽景  
澄我懷稍聞風淅淅東視天欲青西視山已碧舍舟登  
彼岸人家尙墜壁側想此門中曉夢迷阡陌誰知門外  
街已有吟詩客

湘東鎮見梅花

湘水凍玻璃到底不及尺  
低頭波未綠擡頭花已白  
花如開鏡中數點不可摘  
浮香清鶴夢照影壓魚脊  
昔讀離騷經此花未采擇  
短艇雪後來偶然見姑射  
相思隴頭人一樹吹橫笛  
沙岸暮沈沈寒鴉送殘客

泊舟閩阜山看雪並寄雨樵

聞聲疑雨聲對影疑月影  
推篷破疑團一雪四山靜  
頗憶定王臺有雪三萬頃  
險韻仆鼓旗劇語調湯餅  
更爲古雪歌蓮花夢香冷  
離別已三商清涼又一境  
開船駒過隙削札雁回嶺  
凍眼送積雲思君輓轡非

舊縣西楚霸王墓

風聲夜起將軍樹四面山河圍不住美人楚舞君楚歌  
烏騅不逝烏江波可憐當日鴻門會地戶天關玉斗碎  
五色誰占天子氣一江已注英雄淚故鄉雖好無時還  
沐猴而冠殊等閒卷土重來惜揮手渡江再見良羞顏  
穀城山前望行路斷碣猶題楚王墓是耶非耶邱壠平  
荒烟蔓草愁人情君不見驪山魂斷宮車出泉下魚鱉  
照枯骨又不見漢家陵闕莽蕭蕭西風落日照鼙號紛  
紛蛇鹿同淒絕匿魄收魂古離別知誰士壘與王頭雨  
打秋墳野花血

眉生小印歌爲陳涇南秀才作

君不見秦淮美人怨芳草夕陽勻染紅蘭橐雲袖低搯  
出一枝鴛鴦小篆安排早梁姬壓腕百八珠金刀切玉  
玉不如芙蓉齋頭橫素練香痕石罅胭脂濡息息流水  
青山夢陽羨書生彈別鳳玉棺珠冢愁烟塵三庭不佩  
青數人迴壁博物尤古嗜徹猶春衣愛遊戲花乳還從  
黃海並沈香不其烏圓瘞可憐往事雪泥鴻鈿閣肩樓  
空復空人前道卻橫波字春印纖纖一捻紅

冷枚華清新浴圖

落如池上烟波綠阿環承幸驪山足水邊已見麗人行

殿角仍歌照影曲照影疑從鏡殿還  
溫泉水膩弄潺湲  
花開陳苑臨春閣波繞吳王銷夏灣  
相從這暑鑾輿度  
卸砌雕闌裊清露內園初進助情花  
別館惟栽銷恨樹  
江妃辭去念奴陪遲日薰風湯殿開  
更無紅葉隨波去  
早見黃裙逐水來須臾起舞雙魚鏡  
綠鬢倭墮紅綃靚  
趙后仙裙自可留洛妃塵鞮應還勝  
當時但詔洗凝脂  
誰賜金錢更洗兒樓中赤鳳來  
何日水底黃虬化有時  
從此華清水鳴咽延秋門上烏啼徹  
忍看驪嶺縣前流  
化作馬嵬坡下血碧落黃泉夢有無  
蘭湯第二冷宮苑  
千年禍水幾傾淚一曲香谿竟沼吳  
金門畫史丹青選

國子先生藏一卷浴鳳塵揚碧海空牽牛淚落銀河淺

宋謝文節公橋亭卜硯歌

卜硯集云硯歛材修九寸七分廣五寸六分額  
篆橋亭卜卦硯五字面左右有元集賢學士程  
文海銘背有明永樂間閩人趙元識搢地得硯  
之由

團湖坪三寸鏘建陽市一片石更無鸚鵡好紋畱應作  
蟾蜍清淚滴自從厯劫厓山麓坑雲五色無人劔荆棘  
難尋祕閣頽泥塗何況橋亭卜不怨魏行省但笑畱承  
旨無勞程集賢猶有趙處士始知神物難久埋南谿七

十三間開得之地下竄狐兔捧出座上生雲雷銅爵香  
姜不足數玉帶水雲乃其伍肯草蠲除詔畱伴趙孟頫  
願寫生祭文移贈王炎午石飛海立五百年硯兮硯兮  
爾良苦憶當流落朝天橋早識三石無江潮祇爲趙氏  
一塊肉未入楊家七客寮好事畱傳閱兵燹黑者踰麋  
碧者薶鼠肝蟲臂已不惜龍眼犀紋那可辨重其人者  
物可悲一書卻聘生光輝警鶴徒倚詹尹市飢鳳太息  
曹娥碑嗚呼寶祐初開藥珠榜放膽文章慨以慷三十  
功名石不言淒涼資國蜘蛛網

磨崖碑

南船昔作涪谿遊，磨崖碑照涪谿流。蓬州書法道州頌，  
一時二妙工雕鏐。我當匡前拂蒼蘚，徘徊不去消煩憂。  
別來七載最蕭索，夢中猶掉祁陽舟。傳觀此本大如席，  
恍遇故物神夷猶。漁陽鼓聲破新曲，閤鈴風雨趨金牛。  
馬嵬不發出天意，已有父老相遮留。後軍二千護太子，  
營門雙鯉來修修。河西司馬首勸進，五箋靈武承天庠。  
靖康之變那可道，汴州錯認疑杭州。始知唐祚二百祀，  
兵馬一洗西京收。付託得人良有以，遂上尊號古罕儔。  
中興巍巍發高頌，乾旋坤轉銷戈矛。奈何治定未思亂，  
先後氣味如薰蕕。天寶車轍覆不戒，長安棋局紛堪愁。

喪君有君聊足慰以暴易暴誰能變飛龍小兒作宰相  
豔妻煽之勢未休摘瓜已聞寢榻諷升屋幾俯齋宮謀  
宦官官妾彼何識要使骨肉成仇讎寢門王季望眼絕  
高將軍去蠻荒州不如隴山一鸚鵡能對使者言安不  
深文疑史兩難辨玉棺猶絡銅絲頭此書此頌亘終古  
谿聲山色清而幽句奇語重竄謨典字青石赤盤螭虬  
但勒豐功紀年月乃有微旨參春秋君臣父子處非易  
摩挲拓紙心悠悠

雨夜發石門縣四十里至烏鎮見月

黃梅已過雨不休夜雲溼上詩人頭烟波淼淼不知處

飛去一葉沙棠舟叩舷歌嘯三十里裳衣吹薄風颼颼  
行聽篷背而脚小仰睇六幕青天收蟬聲兩岸吟未絕  
谿橋野樹相與浮推篷看水漲夕綠釣船高出谿中洲  
潮痕一丈芳草短時見螢火隨東流我家柴門正臨水  
沙際一白眠羣鷗鷺聲到門忽驚起飛上百尺清涼樓  
家人夢醒延我入青燈開出雙扉秋相從吹笛話舊雨  
殘月卻挂西南鉤

觀陳髯所藏馬遠畫紅葉

夜聞落木催鳴鐘玉塵一拂清尊空蕭晨讀畫出黃絹  
邀我雙耳聽西風不知青女降何處霜根敲倒疎玲瓏

迴飈忽作折腰舞，卻憶春柳靈和宮。畫師寄興在秋晚，  
此態得自無人工。遠寫秋聲補秋色，野烟一角斜陽紅。  
一僮綠綺抱而侍，一客紅友攜相從。我雖不識客與僮，  
要非烟火塵凡容。醉眠天暮枕石峰，酒顏霜樹相爲濃。  
江南黃葉到處有，吾儕徑欲扁舟東。爲君婆娑賦枯樹，  
卷圖夢冷吳江楓。

築軒大令贈裘

去年北風吹不休，主人贈我青羔裘。酒酣以往不忍著，  
卻向黃竹簾中收。今年東風射春箭，花凍紅鏗上元宴。  
飛落鴛鴦雙翦刀，牽雲曳雪重相見。平生讀書愛五更，

往往風雨聞鷄鳴曉寒不向夢中賦媿此一只銀鐙檠  
黑貂已敝長安道十丈紅塵不能掃綵筆空題白練裙  
儂歌自唱黃絛襖殷勤鶴警來君家主是烏衣客絳紗  
一身仙骨冷於鐵開出萬朶青蓮花主人之裘有時敝  
主人之情永勿替以詩報君非感恩君不見緇衣詠爲  
風綈袍重其意

甘露寺

我攜仙人九節筇直上北固之高峯天寬地窄飛鳥絕  
江海一氣浮魚龍登臨豈惜煩耳目開拓自覺生心胸  
山川於我本無故與之所到情乃鍾捫蘿卻訪甘露寺

華嚴法界金碧重山僧蒼顏已不俗况有二客能相從  
傳聞狼石臥庭際歲久埋沒荆榛叢當年何人好奇計  
孫劉諸葛皆英雄阿瞞伏櫪志千里欲吞巴蜀無江東  
豈知深山一片石外間大有人圖餽始因歸妹狎親弗  
誰信斬將興兵戎三分割據竊神鼎九錫慚魏超彤弓  
誰能閉門作天子勢不兩立仍兩窮不見水濱爭蚌鷸  
收其利者爲漁翁飛橋已驚出山外巨筏行復衝江中  
可憐風利不得泊遂使王濬貪天功金陵王氣黯無色  
豈獨白帝多悲風江山第一我懷古茫茫南北無遺蹤  
撞鐘擊鼓下山去青天落日銜芙蓉

虞山歸舟

桃花水漲青春老  
船尾蒼烟涼不掃  
夢回篷背聽無聲  
細雨濛濛入天曉  
客來春事鳥初啼  
客去春情花亂飛  
試對山靈歌水調  
贖教春與客同歸

蕭條寒食炊烟收  
野棠花開搖綠疇  
瓜皮艇子出陸墓  
恨無一杯澆古愁  
可憐風雨愁仍在  
鎮日篷窗暗相對  
夕陽忽放野田晴  
已有歸鴉坐牛背

元祐黨籍碑

黨籍碑乃是蔡京之所爲  
搜羅星宿恣謠詠  
跌宕日月爭光輝  
京爲此碑意何居  
書曰奸黨深厠削以欺天下

不可欺以疑後世不可疑但畱名姓紀元祐毋乃董狐  
陰使之不然史之闕文不概見天下後世一一知爲誰  
首列宰相司馬光武臣內臣王與張三百九人一片石  
此石不入朱勔之花綱黃門夜半傳玉册石破天驚橫  
太白畫圖已滅景靈宮姓氏仍磨端禮闕碑雖可毀名  
則崇後人此意將毋同至今價重洛陽紙當日流涕長  
安工清流居然投濁流汴州忽變爲杭州宣和書畫劫  
灰冷此紙一拓何人收黨籍碑下中上往車來軫葫蘆  
樣君不見五屬纒收北寺囚三朝又點東林將

謁文丞相祠

厓山浪花白燕山血花碧鬼火陰房五百年春風又綠  
銅駝陌君不見零丁洋中海水飛又不見萬年枝上挂  
僧衣六陵夜月暗於鏡白骨瘦盡冬青肥江潮况避錢  
塘弩萬竈貔貅自歌舞降表纔書謝道清祭文早就王  
炎午一歌白雁來再歌朱鳥化擊節參軍如意邊招魂  
丞相祠堂下風簷曾讀文山詩蕭條異代不可支手奉  
芙蓉唱青石曠世之感今視昔吁嗟黃冠歸未得花外  
啼鵲關塞黑風沙柴市好名聲香火泥牆古顏色決背  
西峰斜日曛翠旗欲下雲中君千秋願奏神弦曲恨少  
彈琴汪水雲

古常山郡弔蜀漢趙順平侯

同仇可以辦國賊同姓可以儼國色卽此豈是尋常人  
子龍不獨膽一身燕南垂趙北際執手而別知此意大  
震長坂名小失斜谷利早經百戰上青天直爲三分悲  
白帝侯如前守土荊州未必呂蒙槽侯如後永年陰平  
未必鄧艾毘侯今零落歸山阿某水某邱故里過千秋  
灑淚誰最多請君視此滹沱河

磁州講武城疑冢行

有手不執五色格有口不讀九錫文有酒不澆七十二  
堆纍纍之疑墳七十二墳盡銷歇黃土無多况白骨縱

然老是鄉何用狡爲窟君不見銅臺百尺烏呼風石椁  
三年狐拜月可憐兒女分香時乾啼溼哭長相思朝來  
欲獻西陵寵未識招魂第幾家逃樓本自迷疑冢亦自  
疑漢家陵闕日猶冷魏國山河草不萋或言阿瞞設計  
愚人耳彌天一棺不在此不知奸骨有時朽奸魄到處  
褫奈何不礮礮落落以生而寂寂寞寞以死死不能夢  
三馬生不能鎖二喬一世之雄一抔土雖有魂魄何足  
豪有手願搥禰衡鼓有口願讀陳琳檄有酒去澆八十  
萬兵不得生還之赤壁

燐祭行

散如高峰之放螢聚如大海之浮萍低如草間之撲蠅  
遠如天際之墜星其聲咄咄其光熒熒其色或綠或白  
或縹青又如露翻荷蓋以混濺風吹柳絲之飄零鳳帶  
瑤玉豆犀帶攢銀釘下迷地戶上天庭燿火簇簇花冥  
冥是時月黑葉落十五蕙雲帷霧屋山笄篁鬼車嘯過  
紅衫廳麥飯一盂水一瓶老僧點鐙來誦經撐霆泣雨  
不可以悉聽閃者鬼眼碧冷者鬼手馨新鬼舊鬼相掣  
粵山魍虎張立肉屏老僧牢坐雙背瞑左饒右鼓中搖  
鈴始言慘澹中言慷慨終焉丁豈骨則有時而朽魄則  
有時而化所不可泯滅者惟此國殤點點哀伶仃君不

見閣可畫像山可勒銘殺賊而爲厲成神而爲靈七尺  
之軀一尺面生爲三軍死爲五丁將軍戰馬野花紫愁  
城萬雉寒不扇此時空闌夢未醒黃鶯白馬春忪惺况  
乃人壽幾何年齒齡長平無寸鍬赤壁無隻舫佳城不  
重貨布陰房不攜娉娉泥犁羅刹不稱幙與緹衣不煖  
千金裘食不饜五侯鯖泰山鴻毛今古一邱貉曷爲鬱  
塞自若有類蜾蠃螟蛉紙錢索索村醪泠泠去此鐵圍  
山外十萬八千又奇里中有極樂世界度諸苦厄復無  
垺厲聲一咒萬響停人頭馬蹄畧具形若飛灰若墮翎  
石攀礪箐瓏玲去來倏忽不知誰使令風毛雨血鐙花

腥

梅花嶺弔史閣部

一寸樓臺誰保障跋扈將軍弄權相已聞北海收孔融  
安取南樓開庾亮天心所壞人不支公於此時稱督師  
豹皮自可留千載馬革終難裹一尸平生酒量浮於海  
自到軍門惟飲水一江鐵鎖不遮攔十里珠簾盡更改  
譬如一局殘棋收公之生死與劫謀死即可見左光斗  
生不願作洪承疇東風吹上梅花嶺還賸幾分明月影  
狎客秋聲蟋蟀堂君王故事胭脂井中郎去世老兵悲  
遷客還家史筆垂吹簫來唱招魂曲拂蓀先看墮淚碑

京口書寄尚之

江海青蒼處飄然一葉舟  
思君令人老作客幾時休  
潮暗西津渡山橫北固樓  
昨宵攜手地鼓吹是揚州

畫壁旗亭杳迴颿驛路分  
溼螢隨雨散涼雁逼秋  
聞扇影淮南月鐘聲海上雲  
紅箋方便字拈韻寄同羣

題龔半帆之鑰出塞錄

白馬長城窟黃龍古戰場  
春風三萬里吹夢過遼陽  
慷慨憐陳琳檄艱難陸賈裝  
輪他雙海燕樓向鬱金堂

山海一盤青茫茫照客星  
請歌前後塞卻望短長亭  
劍氣橫秋老笳聲倚酒醒  
燕支山下路歷歷寫曾經

太湖歸舟聽雨

黃昏放棹行回首暗重城天地正秋色江湖多雨聲水  
窗燒燭短斷岸入烟平長嘯懷漁父蘆花萬點情

風涇歸舟

風涇接魏塘烟景晚蒼茫孤棹迴殘雪春潮擁夕陽夢  
騎雙蛺蝶歌起萬鴛鴦好傍南湖宿寒林月正黃

了善廟

江邊了善廟縹緲暮揚舫斜月一梳白烟螺兩岸青夜  
深山影重魚鱗浪花腥未定今宵泊吾方注水經

沙坪

沙坪東去路天色晚蒼蒼爲愛林嵐好都忘道里長  
澗聲喧石瀑椰影臥朝陽隔塢涼風至時聞橘柚香

題桃花夫人廟

烽火傾城笑香烟賽社春掃眉長樂老沒齒未亡人  
橫草思前事畱花作後身分明雲雨峽朝暮冶遊神

寄懷伊甫秦淮

丁字簾前水秋來綠似裙動搖團扇月停泊洞簫雲鏡  
檻心如寫衙香手自熏三年石城夢蝴蝶夜紛紛  
舊怨花難替新愁草未刪腰量三殿柳眉鎖六朝山  
車馬題詩去江湖載酒還寄聲劉夢得切莫唱陽關

渡江作

西興驛前路猶署望京門  
野草自春色江潮無舊痕  
籃輿三里健烏榜一鐙昏  
明日山陰道詩情與細論

九日將之淮南留別予山雲伯並贈孟楷

秋心不可極直指妙高臺  
一棹江湖去滿城風雨來  
尊空桑葉落艣背菊花開  
城外寒山寺鐘聲首重回

邯鄲道上作

細雨濛濛掃薄埃邯鄲道上杏  
花開春愁宛轉隨車徹  
古意蒼茫付酒杯未熟黃梁  
唐小說已埋青草趙叢臺  
不嫌茆店知音少曲項琵琶  
夜抱來

春晚宴集聞歌

歲歲春歸等逝波  
金尊檀板奈情何  
心驚李賀殘絲曲  
腸斷桓伊清夜歌  
隔嶺音書飛雁少  
閉門風雨落花多  
南鄰亦是消愁地  
乘興還能許再過

白馬湖訪陳琳墓

四州飛檄拓風雲  
能使羣空破膽聞  
時運蒼涼常作客  
文章慷慨欲從軍  
但逢袁紹非知己  
直到溫岐始憶君  
酌酒射陽湖畔路  
秋詩愁唱鮑家墳

胥門懷古

市上簫聲太等閒  
鴟夷不悔屬鏤殷  
歌詞惆悵烏棲曲

鬪氣消沈虎踞山一自挾晴看敵入幾忘傷指喪師還  
不堪楊柳東門路潮打空城碧玉環

遙夜

遙夜蕭然此泊舟不成去住且勾留鐘魚遠近湖邊寺  
鐙火高低水上樓慙盡炎涼人不見聽殘鴻雁客應愁  
無因飛作南塘鳥四面紅窗起棹謳

書壯悔堂文集後

梁園賓客杳難追一卷名山欲付誰南部烟花歌伎扇  
東林姓氏黨人碑平原誠望江淹恨故國深知宋玉悲  
公子世家文苑傳斯人一出竟何爲

玉鈎斜

埋香猶記鬢邊鴉未抵青谿葬麗華清夜西園來殿腳  
錦帆南國卽天涯十圍汴水餘殘柳一畝雷塘有落花  
便化春魂雙燕子阿麼歸去已無家

重過趙北口題柳

丁字紅闌壓畫橋楊低柳合剗迴潮經過短驛遣長驛  
不辨新條與舊條葉落鐘鳴秋色遠水流花謝鬢絲凋  
玉關羌管金城涕未抵吟魂此際銷

一聲

一聲銅斗喚揚舡六曲銀環看掩扉朝鏡家山愁外綠

夜船燈火夢中青微暄天氣衣應減乍別情懷酒未醒  
曾是三層樓上坐玉筵吹徹與誰聽

橫塘

葉落橫塘有逝波畫船猶唱采蓮歌  
沼吳人去春風老破楚門荒暮雨多  
此地烟花非玉樹向來麋鹿是銅駝  
君王自忘三年話不爲傾城怨苧蘿

五人墓下作

殘碑一丈字猶丹落日山塘拂蘚看慷慨何殊酬國士  
倉黃無那惱中官狗屠血濺三關熱馬鬣封流一水寒  
回首西山魂魄餒碧雲何處葬衣冠

高郵懷秦太虛

微雲衰草豔相傳  
淮海風流五百年  
眼底酒杯誰解唱  
古來門巷總堪憐  
三生桃葉論長恨  
萬里藤花怨左遷  
我掉扁舟弄明月  
思君三十六湖邊

平原顏魯公祠

范陽飛牒事情乖  
萬里風雲入壯懷  
帝識李平馳間道  
天畱元結與磨厓  
綵毫氣象書應透  
青石功名蹟未埋  
曾讀唐書新舊傳  
四朝遺淚爲公揩

徹夜

徹夜風聲撼紙窗  
石家蠟燭影幢幢  
同槽斲草憐疲馬

隔院飛花感吹龙薄倖名非十年杜銷魂賦有六朝江  
相逢可要青團扇與畫乘鸞霧一雙

雪夜與女牀山人話別

滴粉搓酥勢未休兩三鎰馘颺高樓撥殘荷葉思焚硯  
關到梅花悔典裘好與煎茶園夜話無端行李入春愁  
平生頗笑相如渴肯遣青山怨白頭

讀穆天子傳

風馬雲車玉女觴知非西母定東王增城已去三青鳥  
荒服何來四白狼兒女埋香彈有淚仙神駐景秘無方  
甫刑刪後祈招逸外傳分明似武皇

張尙之秀才與余別於揚州蓋三年矣比來京師  
相見甚歡而余適當南下祇可作一夕話耳

綠楊城郭赤欄橋江北江南入望遙一夕秦觀逢把酒  
三年韓綽記吹簫曾無白鶴騎春夢祇有黃鷄唱早潮  
今夜懷人芳杜若青燈相對續離騷

與沈小如刺史長春話舊卽送補官保定

識得吳興沈亞之相逢少似別離時三生舊雨如流水  
兩點春星各鬢絲宦海君猶書下考詩城我竟出偏師  
思量水月菴中語此意分明絳蠟知

定州

楊柳添聲第幾關清風明月古中山酒家故事誇千日  
樂府新腔唱兩鬢數點鴉隨殘照去一鉤草認舊根還  
春愁正要逢場寫到處奚囊未肯刪

夷門懷古

市塵車騎兩情通臥榻兵符半夜空六國輸贏歸婦女  
一關開閉老英雄頭顱血有酬恩日肝膽交無折節風  
若鑄黃金買絲繡西園公子此門中

汴梁尋宋故宮遺址

踏破宮牆萬瓦烟夕陽紅似靖康年欲聽簫鼓空流水  
更指榛蕪作弄田彼黍茫茫乾淨土此都渺渺別離天

金牀玉几無消息一角靈光尙宛然

當年燈火下樊樓忍把杭州作汴州橋上鷓啼新法變  
江邊馬渡舊京收石敬良獄天難補簾颺離宮鬼自鉤  
一事輓轡惆悵甚宣和書畫不曾留

洛陽貫紙寫三都爭似千金買諫書報國將軍歸北寺  
移家天子占西湖畫船晴雨花深淺絕塞冰霜雁有無  
此是橋山弓劍地不堪飲器用頭顱

叢殘史冊小朝廷彈入吳弦不耐聽湖上春寒天水碧  
帳中酒熟帝衣青班師怏怏三軍雨攬纜迢迢一使星  
賸有舉簾黃袖子相州樓上話飄零

梁元帝祠

賽社春叢字認梁江陵城外永安坊夢無采女中懷月  
醉有徐妃半面妝木偶申情投筆早土囊故事引杯長  
南朝金粉飄零盡腸斷湘東一瓣香

更誰回首望臺城下策虛傳討賊名入廟牲牲難供養  
升天鱗爪太分明奸雄乘間欺臣節骨肉摧殘藉寇兵  
甯得哀江南一賦暮年蕭瑟庾蘭成

屈原

一部離騷卽楚風美人香草老詩翁恨他生及春秋後  
不得刪同鄭衛中十萬荆臺畱宋玉八千奇字伴揚雄

文詞何與人家國傾倒龍門太史公

長沙晤金二峩孝廉卽別

來聽瀟瀟舊雨聲相逢相別兩情生四年蹤蹟無長住  
數語寒暄又送行楚國香鐙啼鳥換燕郊軟土蹇驢輕  
者回好待秋風起蓴菜江東正可羹

消息一首做三十六體寄懷守齋

消息秋風又隔年燕雲迢遞接湘烟三霄露脚飛寒兔  
千里春心託杜鵑銀漢客歸槎有石玉堂花遠夢無甄  
幾時乞與天孫錦細織登科記一篇

宋宮人餞別汪水雲處

金臺秋老視刀鏤醉殺斜陽上酒顏四塞山河新社宇  
六宮詞賦舊陽關梅花信好憑誰寄楊柳烟銷忍更攀  
二十九人都是客不堪疊唱念家山  
來時荆棘臥銅駝天上星辰一刹那別淚可能填碧海  
夢魂從此渡黃河南朝詩裏青山在北鄙琴聲白髮多  
爲問曾稽唐義士冬青花發近如何

楊忠愍公祠

不上需頭乞郡章殘臺重埽一臺霜力排宰相冰山冷  
聲撼郎官鐵鎖香九廟灰飛無劫火兩楹血食此斜陽  
讀書種子何曾絕愁殺鈴山舊草堂

塞上和戎厭鼓鼙閩中抗疏撤釵笄三邊債帥驕無主  
千古忠臣烈有妻仙錄荒唐天左右朝衣慘澹市東西  
玉照事事堪惆悵碧血何時化紫泥

河西務雪夜偶題

小住河西雪打門轆轤惆悵此黃昏殘詩著手新泥壁  
濁酒開顏老瓦盆蠟燭送寒蟲絳索熏籠催夢蝶温燉  
來朝霽色怱怱去記得飛鴻爪一痕

于忠肅公祠

保邦容易保身難如此頭顱擲一官誰遣兒童歌兩帝  
終教天子坐雲端力翻北宋蒙塵局事異西周禱疾壇

酌取數椽香火地讀公前奏涕沱

戴金谿比部去年於放榜日枉顧適僕他出未遇

尋南下經歲實未嘗奉答也風便附詩自訟

落花聲裏折楊枝剛是高軒枉過時春去逢人寬禮數  
飢來驅我拙言辭三生酒熟歌紅豆一夜燈香記蕩絲  
還有揚州二分月水精簾外看題詩

虎邱二姜先生祠

二妙東萊聚一門百年詩史記梅村全收兒女英雄淚  
別委忠臣孝子魂家國傷心同日破死生揮手兩朝恩  
青山綠水還祠廟劫火無灰血有痕

曉行舊縣道中望穀城殘雪

野店飄燈雪一籌開門細數五更籌連岡落月殘低帽  
著樹春風冷撼裘黃石公書無處讀東阿王賦始言愁  
不知何處梅花發昨夜青山今白頭

春夢

春夢紅粧一枕醒低垂珠箔掩銀屏懷中明月當頭見  
足底輕雷附耳聽雲雨荒臺人縹緲鶯花別院語忪惺  
青驄嘶斷黃雞唱暗指天邊第四星

平望陳愛廬枉書寄示尊甫亦園寄曠廬遺詩刻

集多不佞昔所商定者展誦終篇感歎彌襟

腸斷鄰船一笛塵呼童重與損文鱗別離已是成前世  
著作猶能付後人但有雕蟲畱篆刻更無捫蝨話酸辛  
虎邱山色鶯湖水彈指華嚴涕滿巾

于庭既作城南燈火圖話別頃行李將發復有五  
古三篇見示乃如數答之情同而體異也

選二

琉璃街外虎坊東海樣紅塵似夢中此日別離殊可惜  
昨宵燈火與君同川塗蹤蹟三生定文字因緣一點通  
直道銷魂了無益歡愉愁苦兩難工

一硯燕雲十六州拖泥帶水出盧溝喜無關吏收詩稅  
且折花枝當酒籌立仗不知凡幾馬忘機賸此一聞鷗

祖生不語班生語忍復攀條各自愁

題洪稚存更生齋詩後

蘭陵江上舊書生直向天山絕頂行詩格全身摹杜甫  
酒杯昨日泥陽城千秋餘事傾流輩萬死奇才博好名  
記取君恩無量處烏頭馬角淚縱橫

題黃仲則悔存詩鈔後

傷心人住斷腸天零落棲遲五百篇貧戀微名甘下第  
僻耽佳句僅中年登山臨水誰無恙成佛生天盡可憐  
一紙何如十從事此詩終有此人傳

巴陵杜老武昌崔不獨青山太白才放膽文章少年去

銷魂時候大江來  
酒能化淚紅於血  
夢欲爲烟綠似苔  
亦是英雄亦兒女  
玉樓天上又重開

泊舟菜花溼作

雙谿橋下暮揚舡  
燈火樓臺一帶青  
纜過北門風雨急  
西人殘夢菜花溼

月夜出西太湖作

不抽帆子不安梳  
爾槳霜花細細開  
半夜橫風吹不斷  
青山飛過太湖來

星星漁火近吳江  
聽唱流人水調腔  
一角紅樓深樹杪  
爲誰風露夜開窗

青浦舟夜有寄

開船依舊水西門  
鐙火蕭條又一村  
認得橫雲山下路  
春風七十二黃昏

已過黃梅雨未休  
夕波微綠岸平流  
白鷗眠熟青蛙歇  
偷寫吳淞半夜秋

午時喫飯酉時潮  
夜語方舟慰寂寥  
徑欲抽帆渡黃浦  
漲痕低礙一條橋

剛剛二十月離弦  
別夢蕭蕭載一船  
今夜夜深深幾許  
碧紗窗外水如烟

秦淮偶題

綠蘋碁礙板橋低斜掩紗窗小閣西誰種千條萬條柳  
悄無一箇暮鴉棲

丁字簾前子夜歌鴛鴦小篆寫迴波六朝風雨銷磨盡  
贏得當頭月一梭

舟過山塘聞笛

紅聽疎鐘水上樓笛聲纖遠指痕畱定知吹笛人雙鬢  
可惜湘簾不上鉤

夜雨泊崑山城外

又聽風雨做重陽小泊扁舟興不忘五百年來才一瞬  
無人知有玉山堂

國朝綴輔詩卷五十一

終